

rona ninia terus, komprende ninia terus... to'o halo nia halimar iha oratóriu no deskobre katak nia iha talentu boot ba tebe-bola. Bainhira Mario hahú halimar tebe-bola, senhora Silvia nia terus seidauk hotu, tanba Mario laiha disiplina, tifosu tim seluk sira nian, hasara nia beibeik, tuda nia kareta bainhira nia liu... Ema ko'alía aat de'it kona-ba Mario Balotelli... to'o momentu ne'ebé Italia joga iha Campionadu Europeu 2012 no manán tan golu 2 ne'ebé Mario hatama ba adversariu nia baliza. Bainhira jogu hotu ona, Mario halai sa'e iha ne'ebé ema tuur atu haree, no hakbesik ferik ida, hako'ak nia. Jornalista hotu halai atu hasae foto: senhora Silvia tanis daudaun tan ksolok no Mario dehan: "Ha'u dedika golu rua ne'e ba ha'u-nia inan"

Ita-nia inan sira, hanesan Na'in Feto, hadomi no terus nonok ba oan sira, la'ós de'it inan sira ne'ebé hahoris ita, maibé mós sira ne'ebé hakiak ita ka tau matan ba ita hodi halo ita sai ema boot no tasak. Ita hatene agradese sira ba buat hotu ne'ebé sira halo?

*Ha'u-nia
empeñu*



"Iha ne'ebé fiar iha Na'in Feto sai malirin, sei sai malirin mós fiar iha nia Oan Jezús no Aman Maromak" (L. Feuerbach)

Iha tempo ida ne'e ha'u sei haka'as an atu hamanas ha'u nia fiar iha Na'in Feto

Reza hamutuk:

Orasaun ne'ebé bainbain povu reza iha Timor mak tersu, maibé, Dom Bosco hanorin mós Novena ba Maria Auxiliadora, hodi konvida atu konfia ba Na'in Feto no husu tulun ba nia.

Imi husu ba padre ka madre sira oinsá reza orasaun ida ne'e, no mós bele desire atu reza hamutuk nu'udar grupu hodi tau intensaun ida.

FORMASAUN ANIMADÓR SIRA ORATÓRIU NIAN

MORIS HUSI MARIA VIRJEN

Maria iha parte importante ida iha esperiênsia Dom Bosco nian, hanesan nia rasik dehan: "Maria halo buat hotu", katak ho Maria, ne'ebé sai mediadora entre ema no Maromak, ita bele hato'o ita-nia presiza ba Nia hodi konfia iha Maria nia tulun. Iha Timor ema barak iha devosaun boot ba Na'in Feto, hadomi Nia no fiar Nia... ita koko atu reflète kona-ba ita-nia domin ida ne'e ho YouCat, katekizmu ba foin-sa'e sira.



? *Tansa Maria sei virjen?*

Maromak hakarak katak Jezús iha inan loos ida, maibé nu'udar aman, Maromak hakarak Nia de'it, tanba Nia hakarak hahú moris foun ida ne'ebé la depende husi ema nia kbiit, maibé depende husi Nia de'it.
(KKK 484-504, 508-510)

Maria nia virjindade mak elementu fundamentál iha Jezús nia moris. Nia moris husi feto ida, maibé laiha ema ida nu'udar aman. Iha evanjellu Lukas nian, Maria hateten ba anju: "Ne'e sei sai cin sa los, basa ha'u la hola mane?" (Iha evanjellu uza liafuan "hatene" tanba ba hebreu sira "hatene" la'ós hahalok kakutak nian de'it, maibé hahalok ne'ebé envolve neon, fuan isin... ema nia isin tomak). Anju hatán ba nia: "E:piritu Santu sei tun ba ó" (Lk 1,35). Husi uluk kedas, maski ema barak hasara Kreda, comunidade sarani sira nian fiar iha Maria nia virjindade ne'ebé la'ós simbolu ida, maibé real.

? *Oinsá Espiritu Santu bele opera iha Maria no hamutuk ho Maria?*

Maria loke an no pronta atu simu Maromak nia hahalok (Lk 1,38). Tan ne'e, Espiritu Santu bele halo nia sai "Maromak nia inan" no, tanba "Jezús nia inan", nia sai mós sarani sira no ema hotu nia inan.
(KKK 721-726)

Ho ninia attitude, Maria husik Espiritu Santu halo milagre boot ida: fó isin ba Maromak. Maria simu buat ne'ebé Maromak husu ba nia no ho Espiritu nia kbiit, nia bele akompañia Jezús to'o kruz hun.



Maria iha oan sira seluk karik?

Lae. Maria iha oan rasik ida de'it: Jezús. (KKK 500. 510)

Husi tempu eskolante sira nian, sarani sira hatene katak Maria mak virjen, ne'e katak nia iha oan ida de'it, Jezús tanba Maromak nia oan; no nia la kous tan. Iha aramaiku iha liafuan ida de'it atu temi maun, primu... hanesan iha Timor ita uza liafuan "maun" ba primu sira, kolega, viziñu nst...



Liafuan "Imakulada Konseisaun" katak sa?

Liafuan portuges ne'e dehan katak Maria moris sala laek, katak husi momentu ne'ebé nia hahú moris iha nia inan nia knotak, tan Maromak nia grasa no privilejiu ne'ebé Maromak haraik ba nia, Maria la iha sala orijinál atu nune'e bele fô "horik fatin" furak ba Maromak nia Oan. (KKK 487-492, 508)

Maski Kreda rekoñese ofisialmente realidade ida ne'e iha 1854, sarani sira uluk nian fiar buat ne'e. Maria la iha sala orijinál husi momentu ne'ebé nia hahú moris, la'ós bainhira nia hahú kous Jezús.



Tebes Maria bele tulun ema sira?

Husi bainhira Kreda hahú, sarani sira fiar katak Maria bele tulun sira, no sarani tokon ba tokon halo esperiênsia ida ne'e (KKK 967-970)

Tanba Maria sai ita-nia inan iha kruz hun, hanesan inan di'ak sira, nia pronta atu fô tulun ba nia oan sira. Nia hahú serbisu ida ne'e bainhira sei moris, iha Kana no iha Senakulu bainhira halibur hamutuk ho eskolante sira. Tanba nia domin mai ita sei la kuran, ita bele fiar katak nia sei tulun ita iha momentu susar nian no, hanesan ita reza iha "Ave Maria", iha momentu ne'ebé dehan "ami ata besik atu mate".



*Iha Lalehan, ita iha Inan ida...
tanba Nia hamutuk ho Maromak no
hela iha Maromak, nia hatene ita-
nia laran no bele rona ita-nia haro-
han, nia, nu'udar inan, bele tulun
ho laran-di'ak no hanesan Na'i
dehan: Jezús fô nia ba ita nu'udar
inan atu ita bele hato'o ita-nia
presiza ba nia beibeik*

(Amo Papa emeritu Bento XVI)



Ita bele adora Maria?

Lae. Ita adora Maromak de'it. Ita bele onra Maria nu'udar Jezús Kristu nia inan. (KKK 971)

Bainhira ita adora, ita rekoñese, ho haraik an, katak Maromak mak boot liu buat hotu no Nia rasik halo buat hotu. Maria mak kriatura hanesan ita, maski di'ak liu fali ita. Nia mak ita nia inan iha fiar, tan ne'e ita onra nia hanesan Biblia dehan atu onra aman inan sira. Nia rasik hananu iha Magnificat: "hori ohin ba oin ema hotu sei dehan rahun di'ak mai ha'u" (Lk 1,48)

Kona-ba Maria, iha Biblia, ita la hetan buat barak. Entre pasajen sira ne'ebé temi Maria, ida ne'ebé ha'u gosta liu? Tansá? (ha'u foti Evanjellu no ha'u hili fraze ida, iha pasajen ida ne'e, ne'ebé iha sentidu boot ba ha'u-nia moris)

Iha asembleia ema ida-idak ka grupu ida-idak fahe ninia esperiênsia kona-ba Na'in Feto, hodi relasiona nia ba Jezús no Maromak

ISTÓRIA IDA



Mane sira hatene se mak Mario Balotelli, los ka lae? Jogadór tebe-bola nian ne'ebé joga iha Italia, maski kulit metan.

Mario moris aman inan Afrika nian (Ghana) ne'ebé ba Italia atu buka serbisu, maibé la hetan. Nune'e, bainhira Mario moris no liu tiha tinan ida nia moras, inan lori nia ba ospital no... halai hodi husik nia iha ne'ebá.

Ba loron ruma Polisia buka nia, maibé, tanba sira la hetan ona, sira lori nia ba Serbisu sosiál Governu nian ne'ebé, molok hatama nia iha orfanatu, buka ema ruma ne'ebé bele hakiak nia. Senhora Silvia ferik ona no iha ona oan na'in tolu ne'ebé boot, bainhira rona informasaun ida ne'e, maibé ko'alia tiha ho nia laen Franco no oan sira, sira hamutuk deside atu simu labarik ki'ik oan ne'e no sarani nia ho naran Mario. Moris ladún fasíl ba sira: labarik sira seluk hasara beibeik Mario tanba kulit metan liu, nia mós nakarteen, hatán ho laran hirus ba sira. Maibé maski nune'e, senhora Silvia akompaña labarik ida ne'e nafatin,